

Feskon '12 platform jadi usahawan

Pendedahan awal kepada mahasiswa pelajari asas perniagaan

BATU PAHAT – Bidang keusahawanan antara bidang yang menjadi pilihan siswa setelah menamatkan pengajian di institusi pengajian tinggi (IPT).

Sebagai galakan kepada mahasiswa untuk menceburi bidang perniagaan, pihak Universiti Tun Hussein Onn Malaysia (UTHM) telah mengadakan Festival Konvokesyen (Feskon).

Timbalan Menteri Pembangunan Wanita, Keluarga dan Masyarakat, Senator Datuk Heng Seai Kie berkata, ia juga sebagai salah satu cara untuk mahasiswa wanita belajar mencari duit poket sendiri.

"Feskon siri ke-12 yang diadakan sempena Majlis Konvokesyen UTHM ini secara tidak langsung dapat memberi pendedahan kepada mahasiswa menggunakan konsep 'outsourcing' yang memupuk dan menerapkan kemahiran interpersonal.

"Dalam zaman teknologi dan perkembangan Internet pada masa



Seai Kie merasmikan Feskon'12 UTHM, di Dewan Konvokesyen UTHM.

kini peluang untuk menjangkau bakal pelanggan serta rakan kongsi perniagaan adalah jauh lebih banyak jika hendak dibandingkan pada 20 tahun lepas.

"Mereka boleh mengembangkan perniagaan melalui kemudahan teknologi dan Internet, dan salah satu program yang disediakan

oleh kerajaan ialah 'Get Malaysian Business Online', yang akan dilancarkan pada bulan ini.

"Oleh itu, selain peniaga sedia ada para mahasiswa juga perlu merebut peluang berkenaan untuk menjadi seorang usahawan yang berjaya setelah memahami kepentingan teknologi serta Internet

dalam perniagaan," katanya.

Beliau berkata demikian semasa merasmikan Feskon '12 UTHM, di Dewan Konvokesyen UTHM yang turut dihadiri oleh Penolong Naib Canselor (Hal Ehwal Pelajar & Alumni), Prof Ir Dr Amir Hashim Mohd Kassim.

Feskon '12 UTHM ini juga bakal tercatat dalam The Malaysian Book of Records melalui Program Himpunan Aman Wanita 1 Malaysia (Hawa1M): Rahsia 3K dan Formasi Kerepak 1 Malaysia.

Menurut Seai Kie, dalam Hawa1M ini, ia bakal disertai lebih 5,000 wanita termasuk mahasiswa yang merangkumi satu seminar yang dikenali Seminar Kejayaan, Kekayaan dan Kebahagiaan (Seminar 3K).

"Usaha itu bagi memastikan pembangunan mahasiswa dan juga wanita dalam bidang usahawan dapat melahirkan satu kelompok masyarakat proaktif, berpandangan terbuka dan mempunyai komunikasi yang baik," katanya.